

法句經

吳天竺沙門維祇難等譯



清刻龍藏佛說法變相圖

法句經序

群三

曇鉢偈者衆經之要義曇之言法鉢者句也而法句經別有數部有九百偈或七百偈及五百偈偈者經語猶詩頌也是佛見事而作非一時言各有本末布在諸經佛一切智厥性大仁愍傷天下出興于世開現道義所以解人九十二部經總括其要別爲數部四部阿鎗佛去世後阿難所傳卷無大小皆稱聞如是處佛所在究暢其說是後五部沙門各自鈔衆經中四句六句之偈比次其義條別爲品於十二部經靡不斟酌無所適名故曰法句夫諸經爲法言法句者猶法言也近世葛氏傳七百偈義致深譯人出之頗使其渾惟佛難值其法難聞又諸佛興皆在天竺天竺言語與漢異音云其書爲天書語爲天

語名物不同傳實不易唯昔藍調安侯世高都尉佛調釋梵爲晉實得其體斯已難繼後之傳者雖不能審猶尚貴其實粗得大趣始者維祇難出自天竺以黃武三年來適武昌僕從受此五百偈本請其同道竺將炎爲譯將炎雖善天竺語未備曉漢其所傳言或得梵語或以義出音近質直僕初嫌其爲詞不雅維祇難曰佛言依其義不用飾取其法不以嚴其傳經者令易曉勿失厥義是則爲善座中咸曰老氏稱美言不信信言不美仲尼亦云書不盡言言不盡意明聖人意深邃無極今傳梵義實宜徑達是以自偈受譯人口因順本旨不加文飾譯所不解即闕不傳故有脫失多不出者然此雖詞朴而旨深文約而義博事均衆經章有本故句有義說其在

天竺始進業者不學法句謂之越序此乃始進者之鴻漸深入者之奧藏也可以啓蒙辯惑誘人自立學之功微而所包者廣寔可謂妙要也哉昔傳此時有所不出會將炎來更從諮問受此偈等復得十三品并校往古有所增定第其品目合爲一部三十九篇大凡偈七百五十二章都凡一萬四千五百八十字庶有補益其廣聞焉

法句經卷上

尊者法救撰

吳天竺沙門維祇難等譯

無常品第一

二十有一章無常品者寤欲昏亂榮命難保
惟道是真

睡眠解寤宜歡喜思聽我所說撰集佛言
所行非常謂興衰法夫生輒死此滅爲樂
譬如陶家埏埴作器一切要壞人命亦然
如河駛流往而不返人命如是逝者不還
譬人操杖行牧食牛老死猶然亦養命一
千百非一族姓男女貯聚財產無不衰喪
生者日夜命自攻削壽之消盡如榮穿水
常者皆盡高者亦墮合會有離生者有死
衆生相尅以喪其命隨行所墮自受殃福

解三

三

老見苦痛死則意去樂家縛獄貪世不斷
咄嗟老至色變作耄少時如意老見蹈藉
雖壽百歲亦死過去爲老所壓病條至際
是日已過命則隨滅如少水魚斯有何樂
老則色衰所病自壞形敗腐朽命終其然
是身何用恒漏臭處爲病所困有老死患
嗜欲自恣非法是增不見聞變壽命無常
非有子恃亦非父兄爲死所迫無親可怙
晝夜慢惰老不止姪有財不施不受佛言
有此四蔽爲自侵欺

非空非海中非入山石間無有地方所
脫之不受死是務是吾作當作令致是
人爲此躁擾履踐老死憂知此能自靜
如是見生盡比丘厭魔兵從生死得度
教學品第二

二十有九章教學品者導以所行釋已愚暗得見道明

咄起何爲寐 蝸螺蚌蠹類 隱蔽以不淨

迷惑計爲身 焉有被斫瘡 心而嬰疾痛

邁于衆厄難 而反爲用眠 思而不放逸

爲人學仁迹 從是無有憂 常念自滅意

正見學務增 是爲世間明 所生福千倍

終不墮惡道

莫學小道 以信邪見 莫習放蕩 令增欲意

善修法行 學誦莫犯 行道無憂 世世常安

敏學攝身 常慎思言 是到不死 行滅得安

非務勿學 是務宜行 已知可念 則漏得滅

見法利身 夫到善方 知利建行 是謂賢明

起覺義者 學滅以固 着滅自恣 損而不興

是向以強 是學得中 從此解義 宜憶念行

群三

四

學先斷毋率君二臣 廢諸營從 是上道人
學無朋類 不得善友 寧獨守善 不與愚偕
樂戒學行 奚用伴爲 獨善無憂 如空野象
戒聞俱善 二者孰賢 方戒稱聞 宜諦學行
學先護戒 關閉必固 施而無受 力行勿卧

若人壽百歲 邪學志不善 不如生一日

精進受正法 若人壽百歲 奉火修異術

不如須臾敬 事戒者福勝 能行說之可

不能勿空語 虛偽無誠信 智者所屏棄

學當先求解 觀察別是非 受諦能誨彼

慧然不復惑 被髮學邪道 草衣內貪濁

矇矇不識真 如聾聽五音 覺能捨三惡

以藥消衆毒 健夫度生死 如蛇脫故皮

學而多聞 持戒不失 兩世見譽 所願者得

學而寡聞 持戒不完 兩世受痛 喪其本願

夫學有二 常親多聞 安諦解義 雖困不邪
稊稗害禾 多欲妨學 耘除衆惡 成收必多
慮而後言 辭不强梁 法說義說 言而莫違
善學無犯 畏法曉認 見微知著 戒無後患
遠捨罪福 務成梵行 終身自攝 是名善學

多聞品第三

釋三

五

十有九章多聞品者亦勸文學積聞成聖自
致正覺

多聞能持固	奉法爲垣牆	精進難喻毀
從是戒慧成	多聞令志明	已明智慧增
智則博解義	見義行法安	多聞能除憂
能以定爲歡	善說甘露法	自致得泥洹
聞爲知律法	解疑亦見正	從聞捨非法
行到不死處	爲能師見道	解疑令學明
亦興清淨本	能奉持法藏	能攝爲解義

解則戒不穿	受法倚法者	從是疾得安
若多少有聞	自大以憍人	是如盲執燭
照彼不自明	夫求爵位財	尊貴昇天福
辯決世間悍	斯聞爲第一	帝王聘禮聞
天上天亦然	聞爲第一藏	最富勢力強
智者爲聞屈	好道者亦樂	王者盡心事
雖釋梵亦然	仙人尚敬聞	況貴巨富人
是以慧爲貴	可禮無過是	事日爲明故
事父爲息故	事君以力故	聞故事道人
人爲命事醫	欲勝依豪強	法在智慧處
福行世世明	察友在爲謀	別伴在急時
觀妻在房樂	欲知智在說	聞爲今世利
妻子昆弟友	亦致後世福	積聞成聖智
是能散憂患	亦除不祥衰	欲得安隱吉
當事多聞者	所瘡無過憂	射箭無過愚

是壯莫能拔 唯從多聞除 盲從是得眼
闇者從得燭 示導世間人 如目將無目
是故可捨癡 離慢豪富樂 務學事聞者
是名積聚德

篤信品第四

釋二

十有八章篤信品者立道之根果於見正行
不回顧

信慙戒意財 是法雅意譽 斯道明智說
如是昇天世 愚不修天行 亦不譽布施
信施助善者 從是到彼安 信者真人長
念法所信安 近者意得上 智壽壽中賢
信能得道法致滅度 從聞得智 所到有明
信能度淵 攝爲船師 精進除苦 慧到彼岸
士有信行 爲聖所譽 樂無爲者 一切縛解
信之與戒 慧意能行 健夫度患 從是脫淵

信使戒誠 亦受智慧 在在能行 處處見養
比方世利 慧信爲明 是財上寶 家產非常
欲見諸真 樂聽講法 能捨慳垢 此之爲信
信能渡河 其福難奪 能禁止盜 野沙門樂
無信不習 好剝正言 如拙取水 涵泉揚泥
賢夫習智 樂仰清流 如善取水 思令不擾
信不染他 唯賢與人 可好則學 非好則遠
信爲我興 莫知我載 如大象調 自調最勝
信財戒財 慙愧亦財 聞財施財 慧爲七財
從信守戒 常淨觀法 慧而履行 奉教不忘
生有此財 不問男女 終已不貧 賢者識真
戒慎品第五

釋三

七

十有六章戒慎品者授與善道禁制邪非後
無所悔也
人而常清奉律至終 淨修善行 如是戒成

慧人護戒福致三寶名聞得利後上天樂
常見法處護戒爲明得成眞見輩中吉祥
持戒者安令身無惱夜卧恬惓寤則常歡
修戒布施作福爲福從是適彼常到安處
何終爲善何善安止何爲人寶何盜不取
戒終老安戒善安止慧爲人寶福盜不取
比丘立戒守攝諸根食知自節悟意令應
以戒降心守意正定內學止觀無忘正智
明哲守戒內思正智行道如應自清除苦
蠲除諸垢盡慢勿生終身求法勿暫離聖
戒定慧解是當善惟都已離垢無禍除有
着解則度餘不復生越諸魔界如日清明
狂惑自恣已常外避戒定慧行求滿勿離
持戒清淨心不自恣正智已解不覩邪部
是往吉處爲無上道亦捨非道離諸魔界

惟念品第六

十有二章惟念品者守微之始內思安般必
解道紀

出息入息念具滿諦思惟從初竟適利

安如佛所說是則照世間如雲解月現

起止學思惟坐卧不廢忘比丘立是念

前利後則好始得終必勝誓不願生死

若現身所念六更以爲最比丘常一心

便自知泥洹已有是諸念自身常健行

若其不如是終不得意行是隨本行者

時三

如是度愛勞若能悟意念知解一心樂

應時等行法是度生死惱比丘悟意行

當今應是念諸欲生死棄爲能作苦際

常當聽微妙自覺悟其意能覺者爲賢

終始無所會以覺意能應日夜務學行

當解甘露要 令諸漏得盡 夫人得善利
乃來自歸佛 是故當晝夜 常念佛法衆
已知自覺意 是爲佛弟子 常當晝夜念
佛與法及僧 念身念非常 念戒布施德
空不願無相 晝夜當念是

慈仁品第七

十有九章慈仁品者是謂大仁聖人所履德
普無量

爲人不殺常能攝身是處不死 所適無患
不殺爲人 慎言守心 是處不死 所適無患
彼亂已整 守以慈仁 見怒能忍 是爲梵行
至誠安徐 口無麤言 不瞋彼所 是謂梵行
垂拱無爲 不害衆生 無所憍惱 是應梵行
常以慈哀 淨如佛教 知足知止 是度生死
少欲好學 不惑於利 仁而不犯 世上所稱

解三

九

仁壽無犯 不興變狀 人爲諍擾 慧以嘿安
普愛賢友 哀加衆生 常行慈心 所適者安
仁儒不邪 安止無憂 上天衛之 智者樂慈
晝夜念慈 心無尅伐 不害衆生 是行無仇
不慈則殺 違戒言妄 愚不施與 不觀衆生
酒致失志 爲放逸行 後墮惡道 無修不眞
履仁行慈 博愛濟衆 有十一譽 福常隨身
卧安覺安 不見惡夢 天護人愛 不毒不兵
水火不喪 在所得利 死昇梵天 是爲十一
若念慈心 無量不廢 生死漸薄 得利度世
仁無亂志 慈最可行 愍傷衆生 此福無量
假令盡壽命 勤事天下神 象馬以祠天
不如行一慈

言語品第八

十有二章言語品者所以戒口發說談論當

用道理

惡言罵詈 僞陵憐人 興起是行 疾怨滋生
遜言順辭 尊敬於人 棄結忍惡 疾怨自滅
夫士之生 斧在口中 所以斬身 由其惡言
諍爲少利 如掩失財 從彼致諍 令意向惡
譽惡惡所譽 是二俱爲惡 好以口噲鬪
是後皆無安 無道墮惡道 自增地獄苦
遠愚修忍意 念諦則無犯 從善得解脫
爲惡不得解 善解者爲賢 是爲脫惡惱
解自挹損惡 不躁言得中 義說如法說
是言柔軟甘 是以言語者 必使已無患
亦不尅衆人 是爲能善言 言使意投可
亦令得歡喜 不使至惡意 出言衆悉可
至誠甘露說 如法而無過 諦如義如法
是爲近道立 說如佛言者 是吉得滅度

解三

爲能作法際 是謂言中上

雙要品第九

二十有二章雙要品者 兩兩相明 善惡有對
舉義不單

心爲法本 心尊心使 中心念惡 即言即行
罪苦自追 車轆于轍 心爲法本 心尊心使
中心念善 即言即行 福樂自追 如影隨形
隨亂意行 拘愚入冥 自大無法 何解善言
隨正意行 開解清明 不爲妬嫉 愍達善言
愠於怨者 未嘗無怨 不愠自除 是道可宗
不好責彼 務自省身 如有知此 永滅無患
行見身淨 不攝諸根 飲食不節 慢墮怯弱
爲邪所制 如風靡草 觀身不淨 能攝諸根
食知節度 常樂精進 不爲邪動 如風大山
不吐毒態 欲心馳騁 未能自調 不應法衣

能吐毒態戒意安靜降心已調此應法衣
以真爲僞以僞爲真是爲邪計不得真利
知真爲真見僞知僞是爲正計必得真利
蓋屋不密天雨則漏意不惟行姪洩爲穿
蓋屋善密雨則不漏攝意惟行姪洩不生
鄙夫染人如近臭物漸迷習非不覺成惡
賢夫染人如附香熏進智習善行成潔芳
造憂後憂行惡兩憂彼憂惟懼見罪心懷
造喜後喜行善兩喜彼喜惟歡見福心安
今悔後悔爲惡兩悔厥爲自殃受罪熱惱
今歡後歡爲善兩歡厥爲自祐受福悅豫
巧言多求放蕩無戒懷姪怒癡不惟止觀
聚如群牛非佛弟子時言少求行道如法
除姪怒癡覺正意解見對不起是佛弟子
放逸品第十

有二十章放逸品者引律戒情防邪檢失以
道勸賢

戒爲甘露道	放逸爲死徑	不貪則不死
失道爲自喪	慧智守道勝	終不爲放逸
不貪致歡喜	從是得道樂	常當惟念道
自強守正行	健者得度世	吉祥無有上
正念常興起	行淨惡易滅	自制以法壽
不犯善名增	發行不放逸	約已自調心
慧能作錠明	不返冥淵中	愚人意難解
貪亂好諍訟	上智當重慎	護斯爲寶尊
莫貪莫好諍	亦莫嗜欲樂	思心不放逸
可以獲大安	放逸如自禁	能覺之爲賢
已昇智慧閣	去危爲即安	明智觀於愚
譬如山與地	居亂而身正	彼爲獨覺悟
是力過師子	棄惡爲大智	睡眠重若山

癡冥爲所蔽 安卧不計苦 是以常受胎

不爲時自恣 能制漏得盡 自恣魔得便

如師子搏鹿 能不自恣者 是爲戒比丘

彼思正靜者 常當自護心 比丘謹慎樂

放逸多憂愆 變諍小致大 積惡入火焚

守戒福致喜 犯戒有懼心 能斷三界漏

此乃近泥洹

若前放逸後能自禁 是照世間念定其宜

過失爲惡追覆以善 是照世間念善其宜

少壯捨家盛修佛教 是照世間如月雲消

人前爲惡後止不犯 是照世間如月雲消

生不施惱死時不感 是見道悍應中勿憂

斷濁黑法學惟清白 度淵不反棄倚行止

不復染樂欲斷無憂

心意品第十一

十有二章心意品者說意精神雖空無形造作無端

意駛於響難護難禁慧正其本其明乃大

輕躁難持唯欲是從制意爲善自調則寧

意微難見隨欲而行慧常自護能守即安

獨行遠逝寢藏無形損意近道魔繫乃解

心無住息亦不知法迷於世事無有正智

念無適止不絕無邊福能遏惡覺者爲賢

佛說心法雖微非真當覺逸意莫隨放心

見法最安所願得成慧護微意斷苦因緣

有身不久皆當歸土形壞神去寄住何貪

心務造處住來無端念多邪僻自爲招患

是意自造非父母爲可勉向正爲福勿回

藏六如龜防意如城慧與魔戰勝則無患

華香品第十二

十有七章華香品者明學當行因華見實使
偽反真

孰能擇地捨監取天誰說法句如擇善華
學者擇地捨監取天善說法句能採德華
知世坏喻幻法忽有斷魔華敷不覩死生
見身如沫幻法自然斷魔華敷不覩死生
身病則痿若華零落死命來至如水湍聚
貪欲無厭消散人念邪致之財爲自侵欺
如蜂集華不饒色香但取味去仁入聚然
不務觀彼作與不作常自省身知正不正
如可意華色好無香吾語如是不行無得
如可意華色美且香吾語有行必得其福
多作寶華結步搖奇廣積德香所生轉好
奇草芳花不逆風熏近道敷開德人遍香
梅檀多香青蓮芳花雖曰是真不如戒香

華香氣微不可謂真持戒之香到大殊勝
戒具成就行無放逸定意度脫長離魔道
如作田溝近于大道中生蓮華香潔可意
有生死然凡夫處邊慧者樂出爲佛弟子
聞愚品第十三

二十有一章聞愚品者將以開矇故陳其然
欲使闡明

不寐夜長疲倦道長愚生死長莫知正法
癡意常冥逝如流川在一行疆獨而無偶
愚人著數憂戚久長與愚居苦於我由怨

辨三

有子有財愚惟汲汲我且非我何有子財

十四

暑當止此寒當止此愚多預慮莫知來變
愚矇愚極自謂我智愚而勝智是謂極愚
頑闇近智如瓢斟味雖久狎習猶不知法
開達近智如舌嘗味雖須更習即解道要

愚人施行爲身招患快心作惡自致重殃
行爲不善退見悔吝致涕流面報由宿習
行爲德善進觀歡喜應來受福喜笑玩習
過罪未熟愚以恬憒至其熟時自受大罪
愚所望處不謂適苦臨墮危地乃知不善
愚意作惡不能自解殃追自焚罪成熾然
愚好美食日月滋甚於十六分未一思法
愚生念慮至終無利自招刀杖報有印章
觀處知其愚不施而廣求所墮無道智
往往有惡行遠道近欲者爲食在學名
貪倚家居故多取供異姓學莫墮三望
莫作家沙門貪家違聖教爲後自匱乏
此行與愚同但令欲慢增利求之願異
求道意亦異是以有識者出爲佛弟子
棄愛捨世習終不墮生死

群三

十五

明哲品第十四

十有七章明哲品者學念行者修福進道法
爲明鏡

深觀善惡心知畏忌畏而不犯終吉無憂
故世有福貪思紹行善致其願福祿轉勝
信善作福積行不厭信知陰德久而必彰
常避無義不親愚人思從賢友狎附上士
喜法卧安心悅意清聖人演法慧常樂行
仁人智者齋戒奉道如星中月照明世間
弓工調角水人調船巧匠調木智者調身
譬如厚石風不能移智者意重毀譽不傾
譬如深淵澄靜清明慧人聞道心淨歡然
大人體無欲在所昭然明雖或遭苦樂
不高現其智大賢無世事不願子財國
常守戒慧道不貪邪富貴智人知動搖

譬如沙中樹 多有志求強 隨色染其素
世皆沒溺 勘克度岸 如或有人 欲度必奔
誠貪道者 攬受正教 此近彼岸 脫死爲上
斷五陰法 靜思智慧 不反入淵 棄倚其明
抑制情欲 絕樂無爲 能自拯濟 使意爲慧
學取正智 意惟正道 一心受諦 不起爲樂
漏盡習除 是得度世

羅漢品第十五

有十章羅漢品者應具人性脫欲無着心不
渝變

去離憂患 脫於一切 縛結已解 冷而無燄
心淨得念 無所貪樂 已度癡淵 如鴈棄池
量腹而食 無所藏積 心空無想 度衆行地
如空中鳥 遠逝無礙 世間習盡 不復仰食
虛心無患 已致脫處 譬如飛鳥 暫下輒逝

群三

十六

制根從正 如馬調御 捨憍慢習 爲天所敬
不怒如地 不動如山 真人無垢 生死世絕
心已休息 言行亦止 從正解脫 寂然歸滅
棄欲無着 缺三界障 婬意已絕 是謂上人
在聚在野 平地高岸 應真所過 莫不蒙祐
彼樂空閑 衆人不能 快哉無婬 無所欲求
述千品第十六

十有六章述千品者示學者徑多而不要不
如約明

雖誦千言 句義不正 不如一要 聞可滅意
雖誦千意 不義何益 不如一義 聞行可度
雖多誦經 不解何益 解一法句 行可得道
千千爲敵 一夫勝之 未若自勝 爲戰中上
自勝最賢 故曰人雄 護意調身 日損至終
雖曰尊天 神魔梵釋 皆莫能勝 自勝之人

月千反祠終身不輟不如須臾一心念法
一念造福勝彼終身雖終百歲奉事火祠
不如須臾供養三尊一供養福勝彼百千
祭神以求福從後望其報四分未望一
不如禮賢者能善行禮節常敬長者
辭三
四福自然增色力壽而安若人壽百歲
遠正不持戒不如生一日守戒正意禪
若人壽百歲邪偽無有智不如生一日
一心學正智若人壽百歲懈怠不精進
不如生一日勉力行精進若人壽百歲
不知成敗事不如生一日見微知所忌
若人壽百歲不見甘露道不如生一日
服行甘露味若人壽百歲不知大道義
不如生一日學惟佛法要
惡行品第十七

二十有二章惡行品者咸切惡人動有罪報
不得無患
見善不從反隨惡心求福不正反樂邪姪
凡人爲惡不能自覺愚癡快意令後鬱毒
殞人行虐沉漸數數快欲爲之罪報自然
吉人行德相隨積增甘心爲之福應自然
妖孽見福其惡未熟至其惡熟自受罪酷
禎祥見禍其善未熟至其善熟必受其福
擊人得擊行怨得怨罵人得罵施怒得怒
世人無聞不知正法生此壽少何宜爲惡
莫輕小惡以爲無殃水滴雖微漸盈大器
凡罪充滿從小積成莫輕小善以爲無福
水滴雖微漸盈大器凡福充滿從纖纖積
夫士爲行好之與惡各自爲身終不敗亡
好取之士自以爲可沒取彼者人亦沒之

惡不即時如擊牛乳罪在陰伺如灰覆火
戲笑爲惡已作身行號泣受報隨行罪至
作惡不起如兵所截牽往乃知已墮惡行
後受苦報如前所習如毒摩瘡船入洄瀾
惡行流憊摩不傷尅

群三

如惡誣罔人清白猶不汙
愚殃反自及

十八

如塵逆風全過失犯非惡
能追悔爲善

是明照世間如日無雲瞠
大士以所行

然後身自見爲善則得善
爲惡則得惡

有識墮胞胎惡者入地獄
行善上昇天

無爲得泥洹非空非海中
非隱山石間

莫能於此處避免宿惡殃
衆生有苦惱

不得免老死唯有仁智者
不念人非惡

刀杖品第十八

十有四章刀杖品者教習慈仁無行刀杖賊

害衆生

一切皆懼死莫不畏杖痛
怨已可爲譬

勿殺勿行杖能常安群生
不加諸楚毒

現世不逢害後世長安隱

不當麤言言當畏報惡往禍來
刀杖歸軀

出言以善如叩眾磐身無義論度世則易

枉杖良善妄讒無罪其殃十倍灾仇無赦

生受酷痛形體毀折自然惱病
失意恍惚

人所誣枉或縣官厄
財產耗盡
親戚離別

舍宅所有灾火焚燒死入地獄
如是爲十

群三

十九

雖裸剪髮被服草衣沐浴踞石
柰疑結何

不伐殺燒亦不求勝仁愛天下
所適無怨

世儻有人能知慚愧是名誘進
如策良馬

如策善馬進道能遠人有信戒
定意精進

受道慧成便滅衆苦

自嚴以修法 減損受淨行 杖不加群生
是沙門道人 無害於天下 終身不遇害
常慈於一切 孰能以爲怨

老耄品第十九

十有四章老耄品者誨人勤力不與命競老
悔何益

何喜何笑 念常熾然 深蔽幽冥 不如求定
見身形範 倚以爲安 多想致病 豈知不真
老則色衰 病無光澤 皮緩肌縮 死命近促
身死神徙 如御棄車 肉消骨散 身何可怙
身爲如城 骨幹肉塗 生至老死 但藏悲慢
老如形變 喻如故車 法能除苦 宜以力學
人之無聞 老若特牛 但長肌肥 無有智慧
生死無聊 往來艱難 意倚貪身 生苦無端
慧以見苦 是故棄身 滅意斷行 愛盡無生

不修梵行 又不富財 老如白鷺 守伺空池
既不守戒 又不積財 老羸氣竭 思故何逮
老如秋葉 行穢檻縷 命疾脫生 不用後悔
命欲日夜盡 及時可勤力 世間諦非常
莫惑墮冥中 當學燃意燈 自練求智慧
離垢勿染汙 執燭觀道地

愛身品第二十

十有四章愛身品者所以勸學終有益已滅
罪興福

自愛身者慎護所守 希望欲解學正不寐

詳三

二十

身爲第一 常自勉學 利乃誨人 不倦則智
學先自正 如後正人 調身入慧 必遷爲上
身不能利 安能利人 心調體正 何願不至
本我所造 後我自受 爲惡自更 如鋼鑽珠
人不持戒 滋蔓如藤 逞情極欲 惡行日增

惡行危身 愚以爲易 善最安身 愚以爲難
如真人教 以道活身 愚者嫉之 見而爲惡
行惡得惡 如種苦種 惡自受罪 善自受福
亦各須熟 彼不相代 習善得善 亦如種甜
自利利人 益而不費 欲知利身 戒聞爲最
如有自愛 欲生天上 敬樂聞法 當念佛教
凡用必豫慮 勿以損所務 如是意日修
事務不失時 夫治事之士 能至終成利
真見身應行 如是得所欲

世俗品第二十一

十有四章世俗品者說世幻夢當捨浮華勉
修道用

如車行道捨平大塗 從邪徑敗 生折軸憂
離法如是從非法增 愚守至死 亦有折患
順行正道 勿隨邪業 行法卧安 世世無患

佛三

千一

萬物爲泡 意如野馬 居世若幻 柰何樂此
若能斷此 伐其樹根 日夜如是 必至于定
一施如信 如樂之人 或從惱意 以飯食衆
此輩日夜 不得定意 世俗無眼 莫見道真
如少見明 當養善意 如鴈將群 避羅高翔
明人導世 度脫邪衆 世皆有死 三界無安
諸天雖樂 福盡亦喪 觀諸世間 無生不終
欲離生死 當行道真 癡覆天下 貪令不見
邪疑却道 若愚行是 一法脫過 謂妄語人
不免後世 靡惡不更

雖多積珍寶 崇高至于天 如是滿世間
不如見道跡 不善像如善 愛如似無愛
以苦爲樂像 狂夫爲所致

法句經卷上

法句經卷下

群四

尊者法救造

吳天竺沙門維祇難等譯

述佛品第二十二

二十有一章述佛品者道佛神德無不利度

明爲世則

群四

已勝不受惡 一切勝世間 叡智廓無疆
開矇令入道 決網無罣礙 愛盡無所積
佛意深無極 未踐迹令踐 勇建立一心
出家日夜滅 根斷無欲意 學正念清明
見諦淨無穢 已渡五道淵 佛出照世間
爲除衆憂苦 得生人道難 生壽亦難得
世間有佛難 佛法難得聞 我既無師保
亦獨無伴侶 積一行得佛 自然通聖道
船師能渡水 精進爲橋梁 人以種姓繫

度者爲健雄 壞惡度爲佛 止地爲梵志
除瞋爲學法 斷種爲弟子 觀行忍第一
佛說泥洹最 捨罪作沙門 無燒害於彼
不燒亦不惱 如戒一切持 少食捨身貪
有行幽隱處 意諦以有黠 是能奉佛教
諸惡莫作 諸善奉行 自淨其意 是諸佛教
佛爲尊貴 斷漏無姪 諸釋中雄 一群從心
快哉福報 所願皆成 斂於上寂 自致泥洹
或多自歸 山川樹神 廟立圖像 祭祀求福
自歸如是 非吉非上 彼不能來 度我衆苦
如有自歸 佛法聖衆 道德四諦 必見正慧
生死極苦 從諦得度 度世八道 斯除衆苦
自歸三尊 最吉最上 唯獨有是 度一切苦
士如中正 志道不慳 利哉斯人 自歸佛者
明人難值 亦不比有 其所生處 族親蒙慶

諸佛興快 說經道快 衆聚和快 和則常安
安寧品第二十三

十有四章安寧品者差次安危去惡即善快而不墮

我生已安 不愠於怨 衆人有怨 我行無怨

我生已安 不病於病 衆人有病 我行無病

我生已安 不感於憂 衆人有憂 我行無憂

我生已安 清淨無爲 以樂爲食 如光音天

我生已安 澹泊無事 彌薪團火 安能燒我

勝則生怨 負則自鄙 去勝負心 無諍自安

熱無過姪 毒無過怒 苦無過身 樂無過滅

無樂小樂 小辯小慧 觀求大者 乃獲大安

我爲世尊 長解無憂 正度三有 獨降衆魔

見聖人快 得依附快 得離愚人 爲善獨快

守正道快 巧說法快 與世無諍 戒具常快

依賢居快 如親親會 近仁智者 多聞高遠
壽命鮮少 而棄世多 學當取要 令至老安
諸欲得甘露 棄欲滅諦快 欲度生死苦
當服甘露味

好喜品第二十四

十有二章好喜品者禁人多喜能不貪欲則無憂患

違道則自順 順道則自違 捨義取所好

是爲順愛欲 不當趣所愛 亦莫有不愛

愛之不見憂 不愛見亦憂 是以莫造愛

愛憎惡所由 已除結縛者 無愛無所憎

愛喜生憂 愛喜生畏 無所愛喜 何憂何畏

好樂生憂 好樂生畏 無所好樂 何憂何畏

貪欲生憂 貪欲生畏 解無貪欲 何憂何畏

貪法戒成 至誠知慚 行身近道 爲衆所愛

欲態不出 思正乃語 心無貪愛 必截流渡
譬人久行 從遠吉還 親厚普安 歸來喜歡
好行福者 從此到彼 自受福祚 如親來喜
起從聖教 禁制不善 近道見愛 離道莫親
近與不近 所往者異 近道昇天 不近墮獄
忿怒品第二十五

二十有六章忿怒品者見瞋恚害寬弘慈柔
天祐人愛

忿怒不見法 忿怒不知道 能除忿怒者
福喜常隨身 貪婬不見法 愚癡意亦然

除婬去癡者 其福第一尊

恚能自制 如止奔車 是爲善御 棄冥入明
忍辱勝恚 善勝不善 勝者能施 至誠勝欺
不欺不怒 意不多求 如是三事 死則上天
常自攝身 慈心不殺 是生天上 到彼無憂

意常覺悟 明暮勤學 漏盡意解 可致泥洹
人相謗毀 自古至今 既毀多言 又毀訥訥
亦毀中和 世無不毀 欲意非聖 不能制中
一毀一譽 但爲利名 明智所譽 唯稱是賢
慧人守戒 無所譏謗 如羅漢淨 莫而誣謗
諸天咨嗟 梵釋所稱 常守慎身 以護瞋恚
除身惡行 進修德行 常守慎言 以護瞋恚
除口惡言 誦習法言 常守慎心 以護瞋恚
除意惡念 思惟念道 節身慎言 守攝其心
捨恚行道 忍辱最強 捨恚離慢 避諸愛貪
不著名色 無爲滅苦 起而解怒 婬生自禁
捨不明健 斯皆得安 瞋斷卧安 恚滅婬憂
怒爲毒本 輒意梵志 言善得譽 斷爲無患
同志相近 詳爲作惡 後別餘恚 火自燒惱
不知慚愧 無戒有怒 爲怒所牽 不厭有務

有力近兵 無力近輓 夫忍爲上 宜常忍羸
舉衆輕之 有力者忍 夫忍爲上 宜常忍羸
自我與彼 大畏有三 如知彼作 宜滅已中
俱兩行義 我爲彼教 如知彼作 宜滅已中
善智勝愚 麤言惡說 欲常勝者 於言宜默
夫爲惡者 怒有怒報 怒不報怒 勝彼鬪負
塵垢品第二十六

十有九章塵垢品者分別清濁學當潔白無
行汙辱

生無善行 死墮惡道 往疾無間 到無資用
當求智慧 以然意定 去垢勿汙 可離苦形
慧人以漸 安徐精進 洗除心垢 如工鍊金
惡生於心 還自壞形 如鐵生垢 反食其身
不誦爲言垢 不勤爲家垢 不嚴爲色垢
放逸爲事垢 慳爲惠施垢 不善爲行垢

群四

五

今世亦後世 惡法爲常垢

垢中之垢 莫甚於癡 學當捨惡 比丘無垢
苟生無耻 如鳥長喙 強顏耐辱 名曰穢生
廉耻雖苦 義取清白 避辱不妄 名曰潔生
愚人好殺 信無誠實 不與而取 好犯人婦
逞心犯戒 迷惑於酒 斯人世世 自掘身本
人如覺是 不當念惡 愚近非法 久自燒沒
若信布施 欲揚名譽 貪人虛飾 非入淨定
一切斷欲 截意根源 晝夜守一 必入定意
著欲爲塵 從染塵漏 不染不行 淨而離愚
見彼自侵 常內自省 行漏自欺 漏盡無垢
火莫熱於姪 捷莫疾於怒 網莫密於癡
愛流駛於河 虛空無轍迹 沙門無外意
衆人盡樂惡 唯佛淨無穢 虛空無轍迹
沙門無外意 世間皆無常 佛無我所有

奉持品第二十七

十有七章奉持品者解說道義法貴德行不用貪侈

好經道者不競於利 有利無利無欲不惑
常慙好學正心以行 權懷寶慧是謂爲道
所謂智者不必辯言 無恐無懼守善爲智
奉持法者不以多言 雖素少聞身依法行
守道不忘可謂奉法 所謂長老不必年耆
形熟髮白 蠢愚而已 謂懷諦法順調慈仁
明達清潔 是爲長老 所謂端正非色如花
慙嫉虛飾言行有違 謂能捨惡根原已斷
慧而無患 是爲端正 所謂沙門非必除髮
妄語貪取有欲如凡 謂能止惡恢廓弘道
息心滅意 是爲沙門 所謂比丘非時乞食
邪行望彼稱名而已 謂捨罪業淨修梵行

群四

六

慧能破惡 是爲比丘 所謂仁明 非口不言
用心不淨 外順而已 謂心無爲 內行清虛
此彼寂滅 是爲仁明 所謂有道 非救一物
普濟天下 無害爲道 戒衆不言 我行多誠
得定意者 要由閉損 意解求安 莫習凡夫
使結未盡 莫能得脫

道行品第二十八

二十有八章道行品者旨說大要度脫之道
此爲極妙
八直最上道 四諦爲法迹 不姪行之尊
施燈必得明 是道無復畏 見淨乃度世
此能壞魔兵 力行滅邪苦 我已開正道
爲大現異明 已聞當自行 行乃解邪縛
生死非常苦 能觀見爲慧 欲離一切苦
行道一切除 生死非常空 能觀見爲慧

次離一切苦 但當勤行道 起時當即起
莫如愚覆淵 與墮與瞻聚 計疲不進道
念應念則正 念不應則邪 慧而不起邪
思正道乃成 慎言守意正 身不善不行
如是三行除 佛說是得道 斷樹無伐本
根在猶復生 除根乃無樹 比丘得泥洹
不能斷樹 親戚相戀 貪意自縛 如犢慕乳
能斷意本 生死無疆 是爲近道 疾得泥洹
貪婬致老 瞋恚致病 愚癡致死 除三得道
釋前解後 脫中度彼 一切念滅 無復老死
人營妻子 不觀病法 死命卒至 如水湍驟
父子不救 餘親何望 命盡怙親 如盲守燈
慧解是意 可修經戒 勤行度世 一切除苦
遠離諸淵 如風却雲 已滅思想 是爲知見
智爲世長 惓樂無爲 知受正教 生死得盡

知衆行空 是爲慧見 疲厭世苦 從是道除
知衆行苦 是爲慧見 疲厭世苦 從是道除
衆行非身 是爲慧見 疲厭世苦 從是道除
吾語汝法 愛箭爲射 宜以自勗 受如來言
吾爲都已除 往來生死盡 非一情以解
所演爲道眼 駛流注于海 翻水漾疾滿
故爲智者說 可趣服甘露 前未聞法輪
轉爲哀衆生 於是奉事者 禮之度三有
三念可念善 三亦難不善 從念而有行
滅之爲正斷 三定爲轉念 棄猗行無量
得三三窟除 解結可應念 知以戒禁惡
思惟慧樂念 已知世成敗 息意一切解
廣衍品第二十九
十有四章廣衍品者言凡善惡積小致大證
應章句

施安雖小其報彌大慧從小施受見景福
施勞於人而欲望祐殃咎歸身自遘廣怨
已爲多事非事亦造伎樂放逸惡習日增
精進惟行習是捨非修身自覺是爲正習
既自解慧又多學問漸進普廣油酥投水
自無慧意群四不好學問凝縮狹小酪酥投水
近道名顯如高山雪遠道暗昧如夜發箭
爲佛弟子常悟自覺晝夜念佛惟法思衆
爲佛弟子常悟自覺日暮思禪樂觀一心
人當有念意每食知自少則是痛欲薄
節消而保壽學難捨罪難居在家亦難
會止同利難艱難無過有比丘乞求難
何可不自勉精進得自然後無欲於人
有信則戒成從戒多致寶亦從得諧偶
在所見供養一坐一處卧一行無放恣

守一以正心必樂居樹間
地獄品第三十
十有六章地獄品者道泥犁事作惡受惡罪
牽不置
妄語地獄近作之言不作二罪後俱受
自作自牽往法衣在其身爲惡不自禁
苟沒惡行者終則墮地獄無戒受供養
理豈不自損死噉燒鐵丸然熱劇火炭
放逸有四事好犯他人婦卧險非福利
毀三姪決四群四不福利墮惡九畏而畏樂寡
王法重罪加身死入地獄譬如拔管草
執緩則傷手學戒不禁制獄錄乃自賊
人行爲慢墮不能除衆勞梵行有玷缺
終不受大福常行所當行自持必令強
遠離諸外道莫習爲塵垢爲所不當爲

然後致鬱毒 行善常吉順 所適無悔悵
其於衆惡行 欲作若已作 是苦不可解
罪近難得避

妄證求賂行已不正 怨譖良人以枉治士
罪縛斯人自投于坑 如備邊城中外牢固
自守其心非法不生 行缺致憂令墮地獄
可羞不羞非羞反羞 生爲邪見死墮地獄
可畏不畏非畏反畏 信向邪見死墮地獄
可避不避可就不就 玩習邪見死墮地獄
可近則近可遠則遠 恒守正見死墮善道

象喻品第三十一

十有八章象喻品者教人正身爲善得善福
報快焉

我如象鬪 不恐中箭當以誠信度無戒人
譬象調正可中王乘調爲尊人乃受誠信

雖爲常調 如彼新馳亦最善象 不如自調
彼不能適人所不至 唯自調者能致調方
如象名財獸 猛害難禁制 繫絆不與食
而猶暴逸象 沒在惡行者 恒以貪自繫
其象不知厭 故數入胞胎 本意爲純行
及常行所安 悉捨降結使 如鈎制象調
樂道不放逸 能常自護心 是爲拔身苦
如象出于埕 若得賢能伴 俱行行善悞
能伏諸所聞 至到不失意 不得賢能伴
俱行行惡悞 魔斷王邑里 寧獨不爲惡
寧獨行爲善 不與愚爲侶 獨而不爲惡
如象驚自護 生而有利安 伴輒和爲安
命盡爲福安 衆惡不犯安 人家有母樂
有父斯亦樂 世有沙門樂 天下有道樂
持戒終老安 信正所正善 智慧最安身

不犯惡最安

如馬調輓 隨意所如 信戒精進 定法要具
明行成立 忍和意定 是斷諸苦 隨意所如
從是住定 如馬調御 斷患無漏 是受天樂
不自放逸 從是多悟 羸馬比良 棄惡爲賢

愛欲品第三十二

三十有二章愛欲品者賤婬恩愛世人爲此
盛生災害

心放在婬行 欲愛增枝條 分布生熾盛
超躍貪果獲 以爲愛忍苦 貪欲著世間
憂患日夜長 蓮如蔓草生 人爲恩愛惑
不能捨情欲 如是憂愛多 潺潺盈于池
夫所以憂悲 世間苦非一 但爲緣愛有
離愛則無憂 已意安棄憂 無憂何有世
不憂不染求 不愛焉得世 有愛以死時

辭四

十一

爲致親屬多 涉憂之長塗 愛苦常墮危
爲道行者不與欲會 先誅愛本 無所植根
勿如刈葦 令心復生

如樹根深固 雖截猶復生 愛意不盡除
輒當還受苦 猿猴得離樹 得脫復趣樹
衆人亦如是 出獄復入獄 貪意爲常流
習與憍慢并 思想猗婬欲 自覆無所見
一切意流衍 愛結如葛藤 唯慧分別見
能斷意根源 夫從愛潤澤 思想爲滋蔓
愛欲深無底 老死是用增 所生枝不絕
但用食貪欲 養怨益丘塚 愚人常汲汲
雖獄有鉤鑊 慧人不謂牢 愚見妻子息
染著愛甚牢 慧說愛爲獄 深固難得出
是故當斷棄 不視欲能安 見色心迷惑
不惟觀無常 愚以爲美善 安知其非真

以姪樂自裹	譬如蠶作繭	智者能斷棄
不盼除衆苦	心念放逸者	見姪以爲淨
恩愛意盛增	從是造獄牢	覺意滅姪者
常念欲不淨	從是出邪獄	能斷老死患
以欲網自蔽	以愛蓋自覆	自恣縛於獄
如魚入筍口	爲老死所伺	若犢求母乳
離欲滅愛迹	出網無所蔽	盡道除獄縛
一切此彼解	已得度邊行	是爲大智士
勿親遠法人	亦勿爲愛染	不斷三世者
會復墮邊行	若覺一切法	能不著諸法
一切愛意解	是爲通聖意	衆施經施勝
衆味道味勝	衆樂法樂勝	愛盡勝衆苦
愚以貪自縛	不求度彼岸	貪爲財愛欲
害人亦自害	愛欲意爲田	姪怒癡爲種
故施度世者	得福無有量	伴少而貨多

釋

十二

商人怵惕懼 嗜欲賊害命 故慧不貪欲
心可則爲欲 何必獨五欲 速可絕五欲
是乃爲勇士 無欲無有畏 恬惓無憂患
欲除使結解 是爲長出淵 欲我知汝本
意以思想生 我不思想汝 則汝而不有
伐樹勿休 樹生諸惡 斷樹盡株 比丘滅度
夫不伐樹 少多餘親 心繫於此 如犢求母
利養品第三十三
有二十章利養品者 勵已防貪 見得思義 不
爲穢生
芭蕉以實死 竹蘆實亦然 駟驢坐姪死
士以貪自喪 如是貪無利 當知從癡生
愚爲此害賢 首領分于地
天雨七寶 欲猶無厭 樂少苦多 覺者爲賢
雖有天欲 慧捨無貪 樂離恩愛 爲佛弟子

遠道順邪貪養比丘止有慳意以供彼姓
勿倚此養爲家捨罪此非至意用用何益
愚爲愚計欲慢用增異哉失利泥洹不同
諦知是者比丘佛子不樂利養閑居却意
自得不恃不從他望望彼比丘不至正定
夫欲安命群四息心自省不知計數衣服飲食
夫欲安命息心自省取得知足守行一法
夫欲安命息心自省如鼠藏穴潛隱習教
約利約耳奉戒思惟爲慧所稱清吉勿怠
如有二明解脫無漏寡智鮮識無所憶念
其於飲食從人得利而有惡法從供養嫉
多結怨利強服法衣但望飲食不奉佛教
當知是過養爲大畏寡取無憂比丘釋心
非食命不濟孰能不搏食夫立食爲先
知是不宜嫉

嫉先創已然後創人擊人得擊是不得除
寧取燒石吞飲鎔銅不以無戒食人信施
沙門品第三十四
三十有二章沙門品者訓以正法弟子受行
得道解淨

端目耳鼻口身意常守正比丘行如是
可以免眾苦手足莫妄犯節言慎所行
常內樂定意守一行寂然
學當守口寡言安徐法義爲定言必柔輒
樂法欲法思惟安法比丘依法正而不費
學無求利無愛他行比丘好他不得定意
比丘少取以得無積天人所譽生淨無穢
比丘爲慈愛敬佛教深入止觀滅行乃安
一切名色非有莫惑不近不憂乃爲比丘
比丘卽船中虛則輕除姪怒癡是爲泥洹

捨五斷五 思惟五根 能分別五 乃度河淵
禪無放逸 莫爲欲亂 無吞鎔銅 自惱焦形
無禪不智 無智不禪 道從禪智 得至泥洹
當學入空 靜居止意 樂獨屏處 一心觀法
當制五陰 伏意如水 清淨和悅 爲甘露味
不受所有 爲慧比丘 攝根知足 戒律悉持
生當行淨 求善師友 智者成人 度苦致喜
如衛師華 熟知自墮 釋姪怒癡 生死自解
正身正言 心守玄默 比丘棄世 是爲受寂
當自飾身 內與心爭 護身念諦 比丘惟安
我自爲我 計無有我 故當損我 調乃爲賢
喜在佛教 可以多喜 至到寂寞 行滅永安
儻有少行 應佛教誡 此照世間 如日無暄
棄慢無餘驕 蓮華水生淨 學能捨彼此
知是勝於故 割愛無戀慕 不受如蓮華

比丘渡河流 勝欲明於故

截流自忖 折心却欲 人不割欲 一意猶走
爲之爲之 必強自制 捨家而懈 意猶復染
行懈緩者 勞意弗除 非淨梵行 焉致大寶
沙門何行 如意不禁 步步著黏 但隨思走
袈裟披肩 爲惡不損 行惡者死 斯墮惡道
不調難戒 如風枯樹 自作爲身 曷不精進
息心非剔 慢訥無戒 捨貪思道 乃應息心
息心非剔 放逸無信 能滅衆苦 爲上沙門
梵志品第三十五

群四

十五

有四十章梵志品者 言行清白 理學無穢 可稱道士

截流而渡 無欲如梵 知行已盡 是謂梵志
以無二法 清淨度淵 諸欲結解 是謂梵志
適彼無彼 彼彼已空 捨離貪婬 是謂梵志

思惟無垢 所行不漏 上求不起 是謂梵志
日照於晝 月照於夜 甲兵照軍 禪照道人
佛出天下 照一切冥

非剃爲沙門 稱言爲梵志 謂能捨衆惡
是則爲道人 出惡爲梵志 入正爲沙門

棄我衆穢行 是則爲捨家

若猗於愛心 無所著 已捨已正 是滅衆苦
身口與意 淨無過失 能攝三行 是謂梵志
若心曉了 佛所說法 觀心自歸 淨於爲水
非族結髮 名爲梵志 誠行法行 清白則賢
剔髮無慧 草衣何施 內不離著 外捨何益
被服弊惡 躬承法行 閑居思惟 是謂梵志
佛不教彼 讚已自稱 如諦不言 乃爲梵志
絕諸可欲 不婬其志 委棄倍數 是謂梵志
斷生死河 能忍超度 自覺出塹 是謂梵志

見罵見擊 嘿受不怒 有忍辱力 是謂梵志
若見侵欺 但念守戒 端身自調 是謂梵志
心棄惡法 如蛇脫皮 不爲欲汚 是謂梵志
覺生爲苦 從是滅意 能下重擔 是謂梵志
解微妙慧 辯道不道 體行上義 是謂梵志
棄捐家居 無家之畏 少求寡欲 是謂梵志
棄放治生 無賊害心 無所燒惱 是謂梵志
避爭不爭 犯而不慢 惡來善待 是謂梵志
去婬怒癡 憍慢諸惡 如蛇脫皮 是謂梵志
斷絕世事 口無麤言 八道審諦 是謂梵志
群四 所施善惡 修短巨細 無取無捨 是謂梵志
今世行淨 後世無穢 無習無捨 是謂梵志
棄身無猗 不誦異言 行甘露滅 是謂梵志
於罪與福 兩行求除 無憂無塵 是謂梵志
心喜無垢 如月盛滿 謗毀已除 是謂梵志

見癡往來墮墮受苦 欲單渡岸不好他語
唯滅不起是謂梵志 已斷恩愛離家無欲
愛有已盡是謂梵志 離人聚處不墮天聚
諸聚不歸是謂梵志 棄樂無樂滅無慍懦
健達諸世是謂梵志 所生已訖死無所趣
覺安無依是謂梵志 已度五道莫知所墮
習盡無餘是謂梵志 于前于後及中無有
無操無捨是謂梵志 最雄最勇能自解度
覺意不動是謂梵志 自知宿命本所更來
得要生盡寂通道玄 明如能默是謂梵志
泥洹品第三十六

三十有六章泥洹品者叙道大歸恬惓寂滅
度生死畏

忍爲最自守 泥洹佛稱上 捨家不犯戒
息心無所害

釋四

十七

無病最利 知足最富 序爲最友 泥洹最快
飢爲大病 行爲最苦 已諦知此 泥洹最樂
少往善道 趣惡道多 如諦知此 泥洹最樂
從因生善 從因墮惡 由因泥洹 所緣亦然
麋鹿依野 鳥依虛空 法歸分別 真人歸滅
始無如不 始不如無 是爲無得 亦無有思

心難見習可觀 覺欲者乃具見
無所樂爲苦除 在愛欲爲增痛
明不染淨能御 無所近爲苦際
見有見聞有聞 念有念識有識
觀無著亦無識 一切捨爲得除
除身想滅痛行 識已盡爲苦竟
猗則動虛則靜 動非近非有樂
樂無近爲得寂 寂已寂無往來
來往斷無生死 生死斷無此彼

此彼斷爲兩滅 滅無餘爲苦除

比丘有世生 有有有作行 有無生無有
無作無所行 夫唯無念者 爲能得自致
無生無復有 無作無行處 生有作行者
是爲不得要 若已解不生 不有不作行
則生有得要 從生有已起 作行致死生
爲開爲法果 從食因緣有 從食致憂樂
而此要滅者 無復念行迹 諸苦法已盡
行滅湛然安 比丘吾已知 無復諸入地
無有虛空入 無諸入用入 無想不想入
無今世後世 亦無日月想 無往無所懸
我已無往反 不去而不來 不沒不復生
是際爲泥洹 如是像無像 苦樂爲已解
所見不復恐 無言言無疑 斷有之射箭
遽愚無所倚 是爲第一快 此道寂無上

釋四

十八

受辱心如地 行忍如門闕 淨如水無垢
生盡無彼受 利勝不足怙 雖勝猶復苦
當自求法勝 已勝無所生 畢故不造新
獸胎無姪行 種燋不復生 意盡如火滅
胞胎爲穢海 何爲樂姪行 雖上有善處
皆莫如泥洹 悉知一切斷 不復著世間
都棄如滅度 衆道中斯勝 佛以現諦法
智勇能奉持 行淨無瑕穢 自知度世安
道務先遠欲 早服佛教戒 滅惡極惡際
易如鳥逝空 若已解法句 至心體道行
是度生死岸 苦盡而無患 道法無親疎
正不問羸強 要在無識想 結解爲清淨
上智厭腐身 危脆非真實 苦多而樂少
九孔無一淨 慧以危貿安 棄猗脫衆難
形腐銷爲沫 慧見捨不貪 觀身爲苦器

生老病死痛 棄垢行清淨 可以獲大安
依慧以却邪 不受漏得盡 行淨致度世
天人莫不禮

生死品第三十七

十有八章生死品者說人魂靈身亡神在隨

行轉生

群四

十九

命如果待熟 常恐會零落 已生皆有苦
孰能致不死 從初樂恩愛 因姪入胎影
受形命如電 晝夜流難止 是身為死物
精神無形法 作令死復生 罪福不敗亡
終始非一世 從癡愛久長 自作受苦樂
身死神不喪 身四大為色 識四陰曰名
其情十八種 所緣起十二 神止九九處
生死不斷滅 世間愚不聞 蔽闇無天眼
自塗以三垢 無目意妄見 謂死如生時

或謂死斷滅 識神造三界 善不善五處
陰行而嘿至 所往如響應 欲色不色有
一切因宿行 如種隨本像 自然報如影
神以身為名 如火隨形字 著燭為燭火
隨炭草糞薪 心法起則起 法滅而則滅
興衰如雨雹 轉轉不自識 識神走五道
無一處不更 捨身復受身 如輪轉著地
如人一身居 去其故室中 神以形為廬
形壞神不亡 精神居形軀 猶雀藏器中
器破雀飛去 身壞神逝生 性癡淨常想
樂身想癡想 嫌望非上要 佛說是不明
一本二展轉 三垢五彌廣 諸海十二事
淵銷越度歡 三事斷絕時 知身無所直
命氣溫暖識 捨身而轉逝 當其死卧地
猶草無所知 觀其狀如是 但幻而愚貪

道利品第三十八

十有九章道利品者君父師行開示善道率之以正

人知奉其上 君父師道士 信戒施聞慧

終吉所生安 群四 宿命有福慶 二十 生世爲人尊

以道安天下 奉法莫不從 王爲臣民主

常以慈愛下 身率以法戒 示之以休咎

處安不忘危 慮明福轉厚 福德之反報

不問尊以卑 夫爲世間將 順正不阿枉

心調勝諸惡 如是爲法王 見正能施惠

仁愛好利人 既利以平均 如是衆附親

如牛厲渡水 導正從亦正 奉法心不邪

如是衆普安 勿妄燒神象 以招苦痛患

惡意爲自然 終不至善方 戒德可恃怙

福報常隨已 見法爲人長 終遠三惡道

戒慎除苦畏 福德三界尊 鬼龍蛇毒害

不犯持戒人 無義不誠信 欺妄好鬭爭

當知遠離此 近愚與罪多 仁賢言誠信

多聞戒行具 當知親附此 近智誠善多

善言不守戒 志亂無善行 雖身處潛隱

是爲非學法 美說正爲上 法說爲第二

愛說可彼三 誠說不欺四 無便獲利刃

自以尅其身 愚學好妄說 行牽受牽戾

貪婬瞋恚癡 是三非善本 身以斯自害

報由癡愛生 群四 有福爲天人 非法受惡形

聖人明獨見 群四 常善承佛令 三 戒德後世業

以作福追身 天人稱譽善 心正無不安

爲惡念不止 日縛不自悔 命逝如川流

見惡宜守戒 今我上體首 白生爲被盜

已有天使召 時正宜出家

吉祥品第三十九

十有九章吉祥品者修已之術去惡就善終厚景福

佛尊過諸天	如來常現義	有梵志道士
來問何吉祥	於是佛愍傷	爲說真有要
已信樂正法	是爲最吉祥	若不從天人
希望求僥倖	亦不禱祠神	是爲最吉祥
友賢擇善居	常先爲福德	勅身從真正
是爲最吉祥	去惡從就善	避酒知自節
不姪于女色	是爲最吉祥	多聞如戒行
法律精進學	修已無所爭	是爲最吉祥
居孝事父母	治家養妻子	不爲空之行
是爲最吉祥	不慢不自大	知足念反復
以時誦習經	是爲最吉祥	所聞當以忍
樂欲見沙門	每講輒聽受	是爲最吉祥

持齋修梵行	常欲見賢聖	依附明智者
是爲最吉祥	以信有道德	正意向無疑
欲脫三惡道	是爲最吉祥	等心行布施
奉諸得道者	亦敬諸天人	是爲最吉祥
常欲離貪欲	愚癡瞋恚意	能習成道見
是爲最吉祥	若以棄非務	能勤修道用
常事於可事	是爲最吉祥	一切爲天下
建立大慈意	修仁安衆生	是爲最吉祥
欲求吉祥福	當信敬於佛	欲求吉祥福
當聞法句義	欲求吉祥福	當供養眾僧
戒具清淨者	是爲最吉祥	智者居世間
常習吉祥行	自致成慧見	是爲最吉祥
梵志聞佛教	心中大歡喜	即前禮佛足
歸命佛法衆		
法句經卷下		

音釋

訥而難言也切湍疾湍也切
音虛駮而小駮火故也切
似駮而小駮火故也切
雙問切含怒意
雙問切含怒意

培苦威同切
駮徒案切
意慢
愠儒
於愠